



FAFANA

Volana Jona 2023 - Laharana 236 - Vidiny 1 000 Ariary

“...Soraty ny fahitana, ka ataovy velona tsara ny soratra eo amin’ny Fàfana, ...” Habakoka 2²

GAZETY AVOAKAN’NY FJKM ANKADIFOTSY ISAM-BOLANA

Saha Edena ➤ 8 Nankalaza an’Andriamanitra noho ny faha-15 taonany



FINARITRA !



Ry havana malala,
Ho aminareo anie ny fiadanana,
Amin’ny fifaliana no iarababana
antsika tojo ity volana Jona ity indray.
Hibanjina lohahevitra vaovao isika
FJKM mandritra ity volana ity dia ny
“Iorenan’ny fahafahana ny Tompo”.
Tena fiainana sarobidy kendren’Andriamanitra ho antsika zanak’olombebona ny fananana “fahafahana” izay
fanisorana ny olona ao anaty fangejana, fatorana na fahaterena. Ka tsy
afaka manoatra eo amin’ny safidy
izay tiana hatao. Ao amin’ny testa-
menta taloha : ny fahafahana dia ny
hikendry ny fanafahana ny zanak’Is-
rael mba hanompo azy. Io ilay fani-
rahan’i Jehovah an’i Mosesy ho any

“Iorenan’ny fahafahana ny Tompo”

amin’i Farao mba handefa ny za-
nak’Israely hanompo Azy, “*Alefaso
ny oloko hanompo Ahy*”. Io fialana
any Egypta izay tsy ahafahan’ny va-
hoakany manompo an’i Jehovah io no
fanafahana kendren’Andriamanitra.
Ny fahafahana izany, dia ny **fahafahana**
manompo an’Andriamanitra.
Ao amin’ny testamenta vaovao indray
ny hoe “**fahafahana**” dia ilay **fia-
nana sy fahaveloma** kendren’i
Jesoa Kristy ho antsika olona, dia ny
fampandresena antsika ao anatin’ny
haiolina sy ny fahafatesana. Ny fitsan-
gan’i Jeosa Kristy tamin’ny maty
no fahatanterahan’izany. Araka an’i
Jaona, dia ny fahaterahana indray no
sitrahantsika izao, fa ho an’i Paoly
Apostoly koa dia ao amin’i Kristy no
hisitrahana izany. Jesoa Kristy dia
miantso ny olona amin’ny famonjena.
Ny maha olom-boaantso no ananana
ny tena **fahafahana**. Fa hoy ny apos-
toly Petera raha milaza ny maha izy
azy antsika fiangonana izy, “*Fa hia-
nareo kosa dia taranaka voafidy, fan-
jaka-pisorona, firenena masina,
olona nalain’Andriamanitra ho an’ny
tenany, mba hilazanareo ny hatsa-
ran’Ilay niantso anareo hiala*”.

amin’ny maizina ho amin’ny fahaza-
vany mahagaga.” I Pet 2:9.

Ny maha olom-boaantso no maha
afaka antsika. Ny fiansoan’Andriamanitra ihany anefa, ka
ny fanekeina izany no maha fiango-
nana ao amin’ny Tompo antsika. Andriamanitra miantso.

“*Kaleo*” dia midika fa nantsoiny
ho amin’ny **fahafahana** isika. Ao
amin’i Jesoa Kristy izay mamaly ny
antsika amin’izany. Fa hoy ny Tompo
“*Fa tsy misy olona mankany amin’ny
Ray afa-tsy amin’ny alaloko.*”

Jesoa no manafaka antsika
amin’ny haizina sy ny fahafatesana
izay fototry ny tsy fahalalana sy ny
fahajambana.

Ry havana, raha mba iriantsika fa-
tratra ny hanana ny tena **fahafahana**,
ao amin’i Jesoa Kristy no ioren-
an’izany. Meteza ho anisan’izay
mino sy mahatoky ary hanaiky an’i
Jesoa ho Tompo sy Mpamony, fa
“*Iorenan’ny fahafahana ny Tompo*”.

Ny Mpitandrina Ravaloson



FIAINAM-PIANGONANA ➤ 6

Recollection FKBM Ny fahamainana ara-panahy



Arahabaina nahatratra ny FETIN’NY RENY

sy ny FETIN’NY RAY

FIAINAM-PIANGONANA ➤ 5

Mpiomana ho Mpiandry sy Mpiandry Fisindana nanamafisana orina ny fifankatiavana



Synodam-paritany Iarivo Avaradrano


Vita ny fivoriambe voalohany

Fivoriambe voalohan'ny Synodam-paritany Iarivo Avaradrano ny 20 Mey lasa teo. Anisan'ny nanana solotena nanatrika izany fivoriambe izany isika teto Ankadifotsy.

Nutanterahina ny sabotsy 20 Mey 2023 tao amin'ny FJKM Ampahidralambo ny fivoriambe voalohan'ny Synodam-paritany Iarivo Avaradrano. Nisy ny fonompoam-pivavahana notantehina tamin'izany ka Andriamanitra Ravaloson Mpitandrina no nitarika ny fotoana ary Andriamatoa Rabetokotany Miarilaza Andriamialy no nitondra ny Tenin'Andriamanitra ka tao amin'ny I Korintiana 6 : 11 no nisintonany ny fampianaranana nilazany fa ny vahoaka tao Kortino dia niasa ary tena mpanompon' Andriamanitra. Manana fahefana Andriamanitra ka miasa amin'ny olona rehetra. Andriamanitra miasa amin'ny Fanahy Masina dia afaka manadio ny olona rehetra. Andriamanitra te hiasa ary te hamonyjantsika ka manaiky hodiovina ve isika ? Ny olona mibebaka dia hiasan'ny Fanahy Masina ary ny olona manana ny Fanahy Masina dia mivoa ny fijeriny. Mibebaka, mivoa fa mandray anao Andriamanitra. Ataovy hita fa olona vaovao ianao.

Nisy ny filazana ny raharahan'ny Synodam-paritany ka ny nandray ny fivoriambe ity dia ny 6 trano. Nampahafantarina fa :

- Ny fihaonambe ny FDL dia ny 15 - 18 Aogositra any Vatomandry
- Ny Aro Riaka mivarotra izay



Ireo mpianakavin'ny finoana nanatrika ny fivoriambe teny Ampahidralambo.

varotan'ny tranom-piantohana ARO : Assurance voina (accident), fiantohana fiara

- Ny Oniversity Ravelojaona 5 taona nisokafana
- Komity faha-55 taona FJKM. Tsangambato: fanatsarana ny Radio Fahazavana sy ny Fahazavana Televiziona (FTV). Ny 18 Aogositra no hanamarhana izany.
- Ny Synodam-pinoana
- Ny fari-piadiam-pampianarana izay misy 20 ny Sekoly eto amin'ny SPIA
- Alahady faharoa ny volana Jona no fitondrana am-bavaka ny Sekoly FJKM.
- Ny fitondrana am-bavaka ny mpiandraikitra foibe dia atao isaky ny faha-3 ny volana Mey.
- Ny komity volafotsy ny SPIA dia manao tolo-bidy izay ma-

nana tany hanaovana ny tsangambato faha-25 SPIA ka hate-rina ao amin'ny foibe ny SPIA izany.

- Ny fanaterana ny boatin-dra-kitra dia hisy fotoan-dehibe anankiray hanatanterahina izany.
- Ny fitsanganan'ny Site Web eto amin'ny Synodam-paritany Iarivo Avaradrano
- Hanao hetsika ihany koa ny komity volafotsy ny 21 Oktobra 2023 amin'ny 2ora ao Antsahamanitra.

Nisy ny Asa vavolombe-lona natao ka nisy mari-pankavisitrahana natolotra ireo nahazo ny laharana voalohany tamin'ny andron'ny Sekoly natao tany Toliera izay nahi-tana ny dihy mirindra, ny vako-drazana, volley, basket.

Notolorana mari-pankavasitrahana koa ireo mpandrahara ny SPIA. Tonga nanotrona tamin'ity fanompoam-pivavahana ity ireo manam-pahefana tao Avaradrano, ny Mpiaandraikitra foibe ary ny filoha mpanampy ny FJKM teo aloha.

Ny nanafana ny fotoana kosa dia ny antoko mpihira avy ao amin'ny FJKM Mamoria-rivo Fitiavana sy ny antoko mpihira FJKM Ambohimana-rivo ary ireo mpianatra sy mpandrahara ny Sekoly FJKM.

Nofaranana tamin'ny fandraisana ny Fanasan'ny Tompo izay nifarimbonan'ireo Mpitandrina mivondrona ao anatin'ny 6 trano.

Nanangona Tojo. R sy Malala Soa

Synodam-paritany Iarivo Avaradrano

Nomarihana ny andron'ny Prezidà synodaly



Ny prezidà synodaly mianakavy.

Nisy ny fitondrana am-bavaka ny prezida synodaly Iarivo Avaradrano sy ny ankohonany ny sabotsy 6 Mey 2023 teo tao amin'ny FJKM Katedraly Analakely, ho fam-paherezana sy fanohanana azy ireo.

Ny nitarika ny fotoana dia Andriamatoa Rakotonirinasoa Hubert Mpitandrina, mpian-draikitra foibe ary ny nitondra ny hafatra kosa dia Andriamatoa Robson Rado Lalaina Johary, Mpitandrina sady Tonian'ny Departemantan'ny fiangonana. Ny nakana ny hafatra dia ny tao amin'ny Salamo 28 : 7 "Jehovah no heriko sy ampingako, Izy no nitokian'ny foko, ka voavonjy aho ; dia misaly ny foko, ka ny hirako no hiderako Azy" ka ni-lazany fa sarotra ny namere-nana ny zanak'Israely hiverina

amin'Andriamanitra. Fitano-nana amin'ny fanamafisam-pinoana sy hanehoana fa Andriamanitra dia mijery ny fiainan'ny olona, mananatra sy manoro ny lalana tokony hizorana hiderana an'Andriamanitra, hanehoana ny hafaliana sy fahasoavana noraisina. Ataovy ho zava-dehibe ny fa-

nomezan'Andriamanitra tamin'ny fiombonana Aminy. Matokia ny fanomezan'Andriamanitra.

Nisy ny solontenan'ny Mpiaandraikitra Foibe, ny firahalahan'ny Mpitandrina, ny FIFAMPI (filankevitra momba ny Fandaminana Mpitandrina), ny FIFAFI (filankevitra

momba ny Fandaminana Fian-gonana), ireo Katekista delege, Talen-tsekoly, ny Mamre (Masera FJKM), ny vahoaka kris-tianina avy eto amin'ny Synodam-paritany Iarivo Avaradrano nanotrona tamin'izany.

Nisy koa ny fandraisam-pitenenana izay nataon'Andriamatoa isany Razafindrabe Solofo Manga Haga Mpitandrina, filohan'ny Firahalahian'ny Mpitandrina, Randriamamonjisoa Philbert Mpitandrina solotenan'ny fianakaviana, Rakotonirinasoa Hubert Mpitandrina Talem-parity ny Sekoly FJKM, Rabetokotany Miarilaza Andriamialy Mpitandrina ary Robson Rado Lalaina Johary Mpitandrina Tonian'ny Departemantan'ny Fiangonana no namarana ny fitenenana.

Nanangona Malala Soa,

Ianja R

NY BAIBOLY INDRAY MIELATRA

Ny testamenta taloha indray mielatra

Tsiahivina fa misy boky 39 ao amin'ny Fanekeha Taloha. Raha atao indray mielatra ny tantara nanamarika ao amin'ireo boky ireo dia:

a. Ny ao anatin'ny boky 5 voalohany:

1. ny fahariana : 4000 taona talohan'i Jesoa Kristy. Misy ny fiandohan'ny zavatra rehetra, izao tontolo izao, ny olombelona sy ny ota, ny safodrano sy ny sambo fiaran'i Noa. Ny tilikambon'i Babela sy ny nipa-ritahan'ny fiteny.

2. Ireo Patriarka : Abrahama, Isaka, Jakoba na i Israely, Josefa nanavotra ny taranak'i Jakoba tam'in'ny mosary tany Egypta.

3. Ny fanafahana tany Egypta : Rehefa nandevozin'ny Egypta 430 taona ny Zanak'Israely dia nentin Andriamanitra hanompo azy tany an'efitra. Ny famakina ny ranomasina mena, ny fimonomonan'ny zanak'Israely, ny nanomezan'Andriamanitra azy ireo sakafo dia ny mana sy papelika, ny fanore-na ny tabernakely. Ireo fitsipi-piaínana napetrak'Andriamanitra mialoha ny nidirana ny tany Kanana.

4. Ny ady nahazoana ny tany Kanana : Rehefa maty Mosesy dia i Josoa no nitarika ny Israelita, ny namakiana ny onin'i Jordana, ireo ady natrehana mba ahazoana ny tany nampantanain'i Jehovah anisan'izany ny fihodinana impito ny mandan'i Jerikoary ny fizana tany.

5. Andron'ny Mpitsara : fotoana nampitontongana ny fiainan'ny Hebreo noho ireo fahotana niverimberina, ny endri-pitsaran'Andriamantra, ny fanafahany, singanina amin'ireny ny tantaran'i Debora, Samsona...Ao koa ny momba an'i Rota sy Boaza, ary ny nahaterahan'i Samoela zanak'i Hana sy Elkana.

6. Andron'ny mpanjaka : nangataka mpanjaka tamin'Andriamanitra ny Israelita. Saoly, nodimbiasan'i Davida, Solomonina ilay mpanjaka nalaza nanana fahendrena, nanorina n tempoly ho an'i Jehovah

7. Ny nizaran'ny fanjakan'Israely ho roa : rehefa maty Solomonina dia nizara ho 2 ny fanjakan'Israely ka ny Atsimo nisy ny Joda sy Benjaminina, ary ny fanjakana avaratra nisy ireo foko 10 tamin'ny 12.

8. Ny fahababoana: Rava Jerosalema, 70 taona sesi-tany tany Babylon.

9. Fiverenana avy amin'ny fahababoana : niverina amin'ny taniny ny Jiosy araka ny didin'i Kirosy, Artakzeres sy nampanganana indray ny tempoly. Nisy in-3 miantoana ny fiverenana : Zerobabela nanangana ny tempoly, Ezra nanangana ny vahoakan'Andriamanitra, Nehemia nanangana ny manda sy ny tanàna.

Nisy hatrany ireo mpaminanin'i Jehovah nirahany hilaza ha-fatra ho an'ny olony tao anatin'izany tantara izany.

Nanangona fifi AV

TSY HARITRA

Inde : voasambotra ilay elefanta mpangala-bary

Tany Kerala, Inde, lasa nalaza be ity elefanta dia iray, izay nokarohina hatramin'ny ela sy kasaina hosamborina noho izy malaza ho mpangala-bary any anaty magazay mpivaro-bary sy mampiasa herisetra ka nahafaty olona efa ho 6 izay voahitsakitsany nandritra ny fotoana fandalovany. Nahazo anarana « Arikoman » na « ilay elefanta mpankafy vary » izy io ary efa an-taona maro no nanaovana velapandrika goavana nisamborana azy, saingy tafatsoaka foana izy tamin'izany noho ny heriny, ary nanohy hatrany ny herisetra fanaony. Efa notsindronina fanafody fampatoriana mahery vaika i Arikoman tamin'ny 2017, fa mbola afaka nandositra ihany izy. Tsy nisy nahomby izay velapandrika rehetra natao. Tam'in'ny 29 Aprily teo kosa, dia mpiambina ala miisa 150 no niara-nisalahy nanao fandrika indray ka tratra tao ilay elefanta. Mbola nanohitra mafy anefa izy na dia efa betsaka aza ny fanafody natsindrona azy. Notakonana lamba ny masonry ary nofatorana ny tongony. Elefanta voahofana manokana miisa 4 no nanampy an'ireo mpisambotra, nanosika an'i Arikoman niditra tao anaty fiara nitondrana azy tany amin'ny toerana manokana fiompiana biby dia.

(source : <https://www.lepoint.fr/monde/>)

RH.



Ny atao hoe zaza sy ny zo fototra ananany

Ny atao hoe zaza

Vokatry ny fifankatiavan'olondroa ary anisan'ny sarobidy indrindra. Tsy olon-dehibe kely, fa zanaky ny olon-dehibe.

Manana izay mahafaly, mahatezitra ary mampalahelo azy toy ny olon-dehibe. Tsy afaka misaina toy ny olon-dehibe.

Zaza mira lalao.

Manana faniriana koa ny zaza.

Manan-jo maromaro ny zaza

- Zo hanana anko-honana.
- Zo hanana anarana raha vao teraka.
- Zo omena sakafo ara-pahasa-lamana.

- Zo hitafy araka ny toet'andro sy ny vanim-potoana.
- Zo hotsaboina raha marary.
- Zo hipetraka amin'ny trano fonenana madio sy milamina.
- Zo hilalao,

- Zo hianatra.
- Zo haneho hevitra.
- Zo hotiav'in'ny Ray sy ny Re-

niny izay tokony ho fantany anarana ihany koa.

Source: Akany Fibéazana Fototra. "Ny Ankohonana no sekoly voalohany" (Rasoanindrina Marguerite, Conseillère pédagogique).

Nanangona Tojo R

Foibe FJKM**Mpiasa sy mpino nianatra ny hafatra fototra entina miasa**

Anisan'ny nisongadina nandritra ny andro natokana ho an'ny mpiasan'ny foibe FJKM natao teto amintsika ny fampianarana entina miatrika ny asa fanompoana sy ny asa amandrahara.

Andro natokana ho an'ny mpiasan'ny foibe FJKM ny alahady fahatelo amin'ny volana Mey tamin'ity taona 2023 ity dia ny alahady 21 Mey no natañeraha izany tao amin'ny FJKM Ankadifotsy. Nanomboka tamin'ny 2ora ny fotoana izay notarihan'ny Tonian'ny Departemantan'ny Mpisa sy Vola ary Fananana ny Fampamokarana Ramatoa Velosoa Andry Nirina.

Fampianarana an-kira sy famelabelaran-kevitra 3 karazana no nentin'ireo mpampianatra sy mpanabe, ny mpahay hary, ary ny mpitandrina filoha mpanampy Birao Mpiandraikitra foibe. Ny fotoana dia noravahan'ireo antoko mphiha Antsan'ny Fanantenana Antohomadimika, ny seha-pitaizana Salema Vaovao. Ny tenim-pahefana avy ao amin'ny FJKM Soamanandriny, ireo mpiasa avy ao amin'ny foibe.

Ny fampianarana voalohany dia niarahana tamin'ny Atoa Faly Rafieferana, mpampianatra sy mpanabe. "Psyko-



Teto amin'ny FJKM Ankadifotsy no nanamarihana ny andro ho an'ny mpiasan'ny foibe FJKM.

lojia sosialin'ny asa, fahafanarana ny tena sy ny filan'ny asa niantsoana ho amin'ny fahombiazana." Nambarany fatokony hiala amin'ny fahazazana ny olona ka tsy tokony hiakin-doha. I Korintianina 13: 1. Mila mpanao isika fa tsy ihara ary mila mampiase ora 1 amin'ny tantaram-pianantsika entina hamokarana. Ny fampianarana faharoa nahitana ny lohahevitra : "Mpisa afaka mandroso, manatsara sy manattra fahariana miainga amin'ny eo am-pelatanana", nentin'Atoa Ramakavelo Faly,

mpahay hary. Izy dia nampianatra ny kristianina manangana asa miainga amin'ny tsy misy, mampanangana fahariana, mitondra Fahazavana. Dingana maro no ahatratarana amin'izany, fa ny voaloahy amin'izany dia ny miainga amin'ny finoana sy ny fanantterhana avy hatrany (pratique). Deuteronomia 28:1-5. Ny fampianarana fahatelo kosa dia niarahana tamin'ny mpitandrina Andriamampianina Zaka Hary Masy, filoha mpanampy ny Birao ny Mpiandraikitra Foibe : "Toe-tsaina kalvinista

sy fanompoana amin'ny alalan'ny asa tanterehina". Nifototra tamin'ny fahaizana mitantana ora, andro fotoana satria avy amin'Andriamanitra izany ary asan'ny finoana.

Nisy ny fampahafantarana ireo mpiasa sy ny rafitra misy eo anivon'ny foibe FJKM. Voalaiza fa santatra ihany ny fampianarana tamin'io fotoana io, fa mbola nisy ihany koa ny 2 Jona 2023 teo tao amin'ny FJKM Analakely. Ny tsirairay izay nanatrika io fampianarana io izany dia tokony nandray ny hafatra fototra entina miatrika ny asa fanompoana sy ny asa aman-drahara ary hanana vina manokana entina mivoa sy manova ny fisainana, ny fiteny, indrindra ny atao. "Koa amin'izany mangataka aminareo aho, ry rahalahy, noho ny famindram-pon'Andriamanitra, mba hatolotraeo ny tenanareo ho fanatitra velona, masina, sitrak'Andriamanitra, dia fanompoam-panahy mety hataonareo izany". (Romana 12 : 1)

Rojo Ramaro

Fifamelan-keloka Fomba iainana izany

Ny Filipiana 4 : 13 dia milaza fa "Mahay ny zavatra rehetra aho ao amin'ilay mampahery ahy." Fa tafiditra ao amin'ny foko sy ny aiko manontolo tokoa ve io teny io? Haiko ve ny mamela heloka ao amin'Andriamanitra mampahery ahy? Andeha hozarantsika eto ny manodidina izany lohahevitra izany.

Zavatra tena sarotra tokoa ny famelan-keloka satria raha adika dia izao no heviny : manarona, mitondra, mamotsotra trosa, avela handeha, manonitra. Marary satria zavatra tena sarobidy taminao no potika ary tsy hiverina intsony, na soloiny aza "ilay very", tsy ilay "taloha" iny : misy fahatsiarovana, misy heviny, misy lanjany. Fahadioana no avela. Na ny olona no manao fahadioana na ny tenantsika, dia tena lalana tsy mora izany. Mila manaiky hiara-dalana amin'Andriamanitra hanao ny dingana. Fanomezana sarobidy ny fananana olona mifampiton-dra ambavaka amintsika hananana hery amin'ny fanaovana izany dingana izany.

Ny olona voavela heloka no olona manana fifandraisana marina sy akaiky sy mamy

amin'i Jesoa Kristy. Rehefa mandeha tsara io fifandraisana io, vao mandeha ny fifandraisana amin'ny hafa.

Ao an-tokantrano, dia tena toeram-panompoana : tsy mahazo sitraka sy mahazo ny fakianana indrindra. Fa ao tokoa no hianarana hiainana ny toeran'Andriamanitra mifamompo araka ny Galatiana 5 : 13-15 : hifanompo ampitiavana fandrao mifandramatra, mifampihinana ka mifandringana. Ny ankohonana iray dia oharina amin'ny voankazo misy voany : paiso, ohatra. Ny voany ao anatin ny mihausenana izany voankazo izany tsy hiparitaka. Miankina amin'ny hamafin'io io voany io : ny ray aman-dreny, ny fikambanan'ny ankohonana. Miantoka ny fitomboan'ny vokatra koa io voany io. Ny fianaran'ny ray aman-dreny ny toeran'Andriamanitra mamela heloka ny fahotany no hahatonga azy ireo koa ho taratry ny toeran'Andriamanitra eo amin'ny zanany, hitobahan'ny fitahiana eo amin'izany ankohonana izany.

Ny tanjon'ny fifamelana dia ny fifanatonan'ny roa tonta : fantavy ny tsirairay ilay

avela, tsy safosoana, tsy ilay hoe : "raha nisy nahadiso aho dia misona aho" satria ianao aza tsy resy lahatra akory. Ity fiaikena ampahibemaso ity no atao hoe fibebahaha.

Andriamanitra mihitsy no mangataka ahy hamela heloka, izaho ilay nanaovana tsy rariny na dia tsy misona aza ilay nanao ny dona. Ny fahamarinana dia rehefa manao ny fahadisoana aho ka mangata-pamelana Aminy, dia Izy Jesoa ihany no hany afaka handoa ny trosako hatramin'ny farany.

TROSANTSIIKA io. Tsy manana handoavana io trosantsika io eo amin'ny Tompo isika. Rehefa mitady fanamarinana ilay "fahadisoana" isika, dia mihodinkondina eo ary mitombo ihany ny trosantsika satria mamorona zava-mitrianga hatrany isika mampitombo izany trosa izany.

Tsy maintsy miala eo amin'io toerana misy ahy io aho, raha vao mitady hevitra hanazvana, hanamarinana... dia vao mainka tafalentika. Tsy safidy ny famelan-keloka ho antsika kristianina. Iny fifanoherana anaty eo anelanelan'ny famelana sy ny fanamelohana, ka hanoverana ny

ratasy izay mitaky famaliana ny rariny sy ny hitsiny, ary hifidianana ny tsara izay mitaky fitiavana, famindramp, fiantrana. Ily ilay lalam-pankatoavana hidirana amin'ny lalam-piadanana izay tsy ho takatr'izao tontolo izao, ananan'ny mpino.

Tsy ho tonga fandresen'ny mpino anefa izany toerana izany, tsy ho hainy, tsy haharesy ny tsy famelan-keloka izy raha toa ka mbola eto amin'ireto toerana 3 ireto :

- Tsy niaina ny famelan-keloka natao taminy izy
- Tsy namela ny fahadisoana natao taminy izy
- Tsy namela ny tenany tamin'ny fahadisoana nataony izy.

Ny Tompo anie hampitombo ny fahatsapantsika ny hamamin'ny olona voavela heloka, ka ananantsika fiadanampo sy fifaliana izay tsy hain'izao tontolo izao horaisina. Ka hahatonga anao ho Filazantsara mivelatra hitondra fahazavana eto amin'ity nosintsiaka tena mila izany hatsaran'i Jesoa Kristy mposaka ao amianao ity.

Nini RATSIMATAHOMANANA

Aïd al-Fitr : inona moa izany ?

Taona vitsy izao no nankatoavan'ny Fitondram-panjakana malagasy ny andro tsy hiasana kanefa andrainas-karama ny "Aïd al-Fitr". Inona moa izany, ary ahoana

no fisehony ?

Fety silamo izy io, manamarika ny fiafarany'ny fifadian-kanina amin'ny volana Ramadany. Miova isantaona ny datin'ity fety ity.

Ny fandinhina ny kin-tana no ahafahana mamari-tra izany. Fotoam-pifaliana sy fifampizarana lehibe ny "Aïd al-Fitr" na koa "Eid al-Fitr", fotoana ahafahan'ny Ramadany

Iamo mifanakalo fanomezana sy mizara sakafom-pety amin'ny namana na fianakaviana aorian'ny volana masina sy fifadian-kanina amin'ny Ramadany

5 mn FAHASALAMANA Aretin-koditra

Hiresaka momba ny aretin-koditra isika. Misy aretin-koditra iray ity, izay somary adino tato ho ato, tsy dia fantavy ny tanora sy ny ankizy akory aza angamba. Marihana anefa fa mbola misy azy eto Madagasikara. Tsy inona izany fa ny aretina habokana na ny "lèpre". Ao amin'ny tetiandron'ny FJKM dia ny volana Janoary no ahatsiarovana ireo marary hoditra, saingy tsy tara velively raha izao isika no miresaka azy ity.

Ny mahakasika ny aretina habokana

Ny habokana dia avy amin'ny tsimokaretina : « bâcille de Hansen » noho izany dia areti-mifindra izy ity fa TSY ARETINA MANARANAKA. Ny habokana dia mifindra amin'ny alalan'ny piti-drora na ny pitidelavoakan'ny marary, saingy tsy mifindra ny aretina raha tsy misy fifampikasohana matetika sy maharitra amin'ny olona voany.

Misoko mangina ny fivoaran'ny habokana satria raha tafiditra ao amin'ny vatana ny otrikaretina dia mety afaka 5 ary mety hahatratra hatramin'ny 20 taona aza vao hita ety ivelany ny fisehony.

Ny fisehon'ny aretina habokana

Eo amin'ny hoditra dia miseho amin'ny tasy mazava loko na manopy mena ny habokana, tsy mangidihidy ary tsy mihofakofaka. Fa ny tena mampiavaka ny tasy ateraky ny habokana dia noho izy tsy mahare, izany hoe donto (insensible): tsy mahare marary, tsy mahare mahamay na mangatsiaka. Mety hitaraina koa ny marary hoe volivoly na tsy mahare tsara eo amin'ny felatana na ny felatongotra. Mety hiseo amin'ny vontsy koa ny habokana ka ny matetika misy azy dia eo amin'ny sofina.

Ny takaitran'ny aretina habokana

Araka ny noresahina teo am-piandohana, dia mame-la takaitra ny habokana raha tsy voatsabo. Ny ahafantaran'ny maro ny mararin'ny habokana (atao hoe boka moa izy ireo, amin'ny voambolana mivantabantana) dia olona izay mondroy ny tanany na ny ton-gony, mety mikainkona ny rantsan-tanany. Mety miteraka fahalemen'ny rantsam-batana mihitsy aza ny habokana. Mety misy fery mandoaka sady sarotra si-tranina eo amin'ny felatongotra na ny tanan'ny marary. Ny habokana dia mety miteraka fahasimbana koa eo amin'ny tarehy. Marihana fa mety hitarika hatramin'ny fahajambana aza ny habokana.

Ny fitsaboana ny aretina habokana

Ireto takaitran'ny habokana voatanisa ireo dia azo sorohana tsara raha voatily ka voatsabo ara-potoana ny aretina. Maimaimpoana ny fitsaboana ny aretina habokana eny amin'ny tobim-pahasalamana ary manana programma manokana momba izany isika eto Madagasikara. Fanafody antibiotika no itsaboana ny habokana ka hanina mandritra ny fotoana maharitra (6 na 12 volana). Tsy maintsy karakaraina koa ny fahitry ny vatana misy ny takaitra mba hampihena na hisorohana ny fihitaran'ny fahavoazana.

Hafatra ho an'ny mpianakavian'ny finoana

Vaolohany : averina fa mbola misy eto Madagasikara ny habokana. Faharoa : areti-mifindra ny habokana fa tsy manaranaka Azo sorohana ny takaitra ateraky ny habokana raha voatsabo ara-potoana ny marary izany hoe raha vao mipoitra ireo tasitasy mampiahahy eo amin'ny hoditra, dia mila manatona ny tobim-pahasalamana. Na dia fantatra aza fa ny olona sahirana no matetika voa, dia ambara fa tsy mifidy sa-ranga ny aretina habokana ka mety ho voany avokoa ny sokajin'olona rehetra, noho izany : aza ahilikili ka ny marary fa ampio izy hahavita ny fitsaboana. Araka ny Tenin'i Jesoa Kristy hoe: « Sitrano ny marary, att-sangano ny maty, diovy ny boka, avoahy ny demonia ; efa nahazo maimaimpoana ianareo, koa manomeza maimaimpoana ». Matio 10, 8

Hanitra Rasolofozafy
Mpikambana eo amin'ny Fikambanan'ny Mpiasan'ny Fahasalamana

TONONKALO

Saha Edena 15 taona

Zany tokoa moa RY RAY ?
 15 taona izay ?
 15 taona nitsanganan'ny Saha Edena maminay
 Nikirakirane voninkazo bemiray
 Ho ravaky ny alitara masina
 Natokana hiderana ANAO MPANJAKANAY
 Natokana hampielezana ny TENINAO
 Ho fitahiana izao tontolo izao
 Isan'alahady isan'alahady
 Mijoro ianao ry Saha Edena
 Io eo ny dian-tananao
 Voninkazo manitra manamanimanitra
 Ny Tranon'ANDRIAMANITRA efa manitra
 Isaky ny andro fety, mariazy sy ny hafa
 Na tsy alahady aza ireny
 Mijoro ianao ry Saha Edena
 Io eo ny dian-tananao
 Voninkazo tsara endrika
 Manamendrimendrika ny efa mendrika
 Ary na entina any ivelan'ny tempoly aza
 Ny fiderana ANAO JESOA
 Mijoro ianao ry Saha Edena
 Io eo ny dian-tananao
 Voninkazo no mandravaka
 Ilay tany foana sady ngazana
 Ireo mpikambana ato anatiny
 Vehivavy lehibe eo koa ny tanora
 Fa tato ho ato nanatevina ny lehilahy
 Mifanome tanana izy ireo
 Hahameva ny tranon'i JEHOVAH
 Dia ny FKJM Ankadifotsy tsy fonay
 Ny fotoam-pivoriana isam-bolana no atao
 Hiantsoana ny Anaran'ILAY TELO IZAY IRAY
 Dia IANAO RY TOMPONAY RAY ZANAKA FANAHY
 Maha-toy izao anay sy ny taranakay
 Nifanesy ireo mpitarika
 Tsy misy iray avakavahana
 Vehivavy mahery fo, mavitrika tokoa
 Vola, fotoana, talenta, ron-doha
 Atobatobany avokoa
 Ho an'ity Fikambanana iriana ho soa
 Ho fankalazana ILAY RAY TSITOHA
 Ireo mpitandrina nifandimby
 Tsy mitsaha-mamentana mba hisafidy
 Hihazone hatrany ny voninkazo
 Indrindra indrindra ireo tsy malazo
 Hampihaingoana ny Fiagonana
 Hahatamana antsika ankohonana
 Antso avo ary no atao
 Andao ho mpikambana koa ianao
 Hanampy isa ny Saha Edena
 Ho voninahitr'IMANOELA

Gisèle - 4 mars 2023

MAZOTOA HOMANA**Romazava royal**

- **Zavatra ilaina :** Hena omby atao matavy tsara (arakaraka ny isan'olona hihinana), akoho gasy, patsabe, anana mifangaro, angivy, sakamalaho, tongolo gasy, tongolo, voatabia, dipovaatra sy sira.

- **Fomba fikarakarana :** Tetebo ny hena sy ny akoho, samy masahana halemy amin'ny vilany samihafa. Tetebo ny voatabia sy tongolo dia endaso, arotsaho ny sakamalaho dia endaso ny patsabe, asio dipovaatra sy sira ary tongolo gasy. Rehefa izay, dia arotsaho ny anana efa voatetika. Rehefa miketriketika ny patsabe sy ny fangarony, dia arotsaho ny hena omby sy ny akoho rehefa malemy mialoha. Avelao hiketrika miaraka, mba hifangaro tsara ny tsirony, ary alefaso ny angivy. Rehefa vita dia arosoy miaraka amin'ny vary gasy mena tsara sy lasary voatabia sy tongolo. Sakafo mendrika tsara rehefa hanamarika ny fetim-pirenena isika.

Mazotoa homana indray àry !

R.Sidonie

MBA SAINO**Meteza ho mpiara-miasa Aminy**

Raha mba fantatrao ny hasarobidin'ny fitiavan'ilay niantso anao,
 dia tsy ho nisalasala na nanam-pandavana hanosika na hampiandry Azy ianao
 amin'ny Iraka izay miantefa aminoao.

Tiany ianao, malalany, tsy foiny
 Koa aza avela hangahiahy lzy
 Raha miantso anao hiara-hiasa Aminy
 Satria ny too anao no ilainy
 Hanao ny Asa Fanompoany

RTH (Rakotoarivelox Tojo-Hery,
 Mandialaza, 18 Mai 2023 à 16h15)

Samihafa

FAFANA

Fianjaika**Gilet doudoune**

Na ny lahy na ny vavy dia samy afaka misalotra ity "gilet doudoune" ity avokoa. Mety koa na atao anaty akanjo na ety ivelany no anaovana azy. Sady mampafana no manome endrika ny bika ny fitondrana azy.

R.Sidonie

Ny ampalibe

Ireo otrikaina sy singa hita ao amin'ny ampalibe :

- A - B - C - CALCIUM - FER - FIBRE
- MAGNESIUM - MANGANESE - PHOSPHORE - POTASSIUM ...



Ireo soa azo avy amin'ny fihinanana ampalibe :

- Tsara ho an'ny taolana sy ny nify
- Miaro amin'ny tsy fahampiana râ
- Mampilamina ny tosindrâ, tsara ho an'ny fo
- Miaro amin'ny homamadihana
- Mampatanjaka sy mampitombo ny hery
- Manampy amin'ny fandovanon-kanina
- Tsara ho an'ny olona voan'ny asthme
- Tsara ho an'ny taovam-pisefoana

- Manala tavy ka tsara ho an'ny olona mampihena vatana

- Tsara ho an'ny hoditra sy miaro amin'ny kentrona
- Manampy ny fiasan'ny tsinay
- Mandrindra ny tahan'ny siramamy ao anaty râ
- Mampidina ny tahan'ny cholestérol
- Manatsara ny maso sy ny fahitana
- Mampitombo hery fiarovana

Tsara ho an'ny fahasalamana ny fihinanana ampalibe. Azo karakaraina amin'ny fomba maro izy, toy ny ranomboankazo, chips ... Mazotoa àry!

Fanja Raveloarijaona

STK 125 taona Sakafon-jobily eny amin'ny FOFIKRI Ilafy

Mitohy ny fankalazana an'Andriamanitra noho ny faha-125 taonan'ny Sampana Tanora Kristianina eto amintsika ka ny hetsika manaraka dia ny sakafon-jobily.

Ao anatin'ny ezaka tsangambato fana-ma f i s a m - p e o hanamarihana ny faha-125 taonan'ny Sampana Tanora Kristianina eto amintsika, dia hisy ny sakafon-jobily hokarakain'izy ireo eny amin'ny FOFIKRI Ilafy ny 18 Jona hoavy izao.

50.000 Ariary no viden'ny tapakila amin'izany, ka misy mivarotra izany isaky ny alahady eo an-to-kotanim-piangonana. Ny Mpihiran'ny Farimbona sy ny tanora mpikambana ao amin'ny STK no hanafana

R.Sidonie



Ny STK eto amin'ny FJKM Ankadifotsy.

Mpiomana ho MPIANDRY sy MPIANDRY Fisindana nanamafisana orina ny fifankatiavana



Ireo mpiomana sy mpiandry teny Ivato.

Teny amin'ny toeram-pnanomanana Mpitandrina FJKM, Ivato, no notanterahina ny fisindan'ny mpiomana sy mpiandry misa 51 ny alakamisy 18 Mey 2023 teo. Izany dia natao hanamafisana orina ny fifankatiavana sy ny fifandraisana eo amin'ny samy mpikambana. Fa n o m p o a m - p i v a - vahana notarihan'ny filohan'ny sampana Nenitoa Rasoanaivo Anna, no nanombohana ny fotoana. Nasongadiny tamin'izany fa fitiava n'Andriamitra no nahatonga ny tsirairay ho mpiomana, ho mpiandry. Izany moa dia araka ny Filazantsara Masina araka an'i Jaona 13:34-35.

Taorian'izay dia niroso tamin'ny dinidinika sy hafatrafatra ary filazan-draharaoha ny Sampana. Taorian'ny sakafo atoandro, dia nitsidika ny toe-

rana ny rehetra. Samy gaga sy talanjona avokoa nahita ireo karazan-javamaniry hafakely toy ny voanjo mandady fanao "gazon"; ny hazo izay tsy ahitana ravina fa vony fotsy ihany, ny hazo avo faniry sy lehibe, tao koa ireo voankazo maro samihafa.

Ny tolakandro dia niroso tamin'ny fampianaranana nen-

tin'ny Raiamandreny Mpitandrina Ravaloson mahakasika ny fiovan-dasitra sy ny fiainam-panompoana. Nisongadina tamin'izany fa mila mivoaka ny faritra mahazatra raha te hitondra famandrosoana sy fampivoarana. Ny Tenin'Andriamanitra no fitaovana mahomby entina mivoatra.

Ny fiainam-panompoana kosa dia voafaritra ara-tSoratra Masina; ara-teolojia; arantara; ara-hai-piarahamonna; ary indrindra ny fiainam-panompoana dia izay angatahama amin'ny Ray.

Fehiny, tian' Andriamanitra hanana ny toetrary, ny fombany, ny fisainany isika koa iaino, ivelomy, ifaneraserao ny tenin'andriamanitra.

Farany, amin'ny alarobia 14 Jona 2023 no hizarana "harona ahitana kojakaja ilaina amin'ny fiainana andavanandro" ho an' ireo madiniky ny Tompo.

Amin'ity volana Jona 2023 ity ihany koa no hanaovana ny favoriamben'ny mpiandry hotanterahina ato amin'ny fitandremana.

Harilalaina A.

Ambatofotsy Fisindana sampana Sekoly Alahady



Ireo rehetra tonga tamin'ny fisindana Sekoly Alahady.

Niisa 154 ireo mpianatra, mpampianatra, mpandrahara, ary ray aman-dreny tonga tamin'ny fisindan'ny sampana Sekoly Alahady natao teny amin'ny ivotoerana fanomanana Tily, Tranom-bitsika, Ambatofotsy Antsahamarofoza ny ny Alatsinainy 1 Mey 2023 teo. Efa voalahatra ao anatin'ny tetikandron'ny sampana ny fantaoterahana izany isan-taona.

Fanompoam-pivavahana fohy no nanombohana ny fo-toana izay nitondran-dRamato Bakoly, mpandrahara, ny hafatra tao amin'ny Filazantsara Masina araka an'i Matio; Mat 18: 19-20, izay nanasongadinany fa rehefa mifanao fanekena ny olona roa na maromaro, ka mame-traka izany amin'ny Tompo, ka araka ny sitrapon'Andria-

manitra izany, dia mahazo valim-bavaka. I Jesoa dia tsy mivadika amin'ny fanekeny ary isika koa dia tokony hanaiky sy hanatanteraka izany fanekena izany. Ary eo anivontsika mandrakariva ny Tompo.

Taorian'izany dia niton-

dra fampianaranana mahakasika ny tontolo iainana sy ny heriseta Ramatoa Marie. Ny tontolo iainana izay tokony hajaina, tandremana, kojakojaina. Ny heriseta kosa dia fampiasana hery na teny na fihetsika mampijaly ny hafa. Ohatra, ny famalivaliana ny

ray aman-dreny, ny fanambanana totohondry ny namana, ny fiteny miiba, mandratra. Nanentana hatrany izy mba tsy hanaovana herisetra. Mba tsy hisian'ny heriseta ary dia mila mifanaja na amin'ny kely na amin'ny lehibe. Ary mba ho fiteny miabo no ifanazarana na aiza na aiza. Nofintinina tamin'ny hoe: "Ny fo salafaly, mahasalama tsara mandrakariva na aiza na aiza", ny fampianaranana.

Ankoatra izany dia nisy ny laalo niraisana isaky ny sokajy misy ny ankizy, tanora, lehibe. Ary anisan'ny navitrika tamin'ny fampilaovana Ramatoa Berthine.

Teo am-pamaranana dia nisaotra ireo rehetra tonga tamin'ny fisindana ny birao Sekoly Alahady.

Harilalaina A.

Alahadin'ny Mpitandrina misotro ronono Nomarihana voalohany teto amin'ny FJKM Ankadifotsy

Nomarihana voalohany teto amin'ny FJKM Ankadifotsy ny 21 Mey 2023 lasa teo ny « Alahadin'ny Mpitandrina misotro ronono ». Fotoana nitondrana am-bavaka ny Mpitandrina Ranjakavola mivady sy nanohana azy ara-bola.

Niankina betsaka tamin'ny fiantsoan' Andriamanitra ny toriteny tamin'io fotoana io. Tokony hahatsiaro hatrany isika mpino fa miantsa antsika ny Tompo ho fitaovana mahomby eo am-pelatanany. Naka ohatra an'i Abrama ny mpitoky teny tamin'izany, izay nalaina tao amin'ny Genesisy 12 : 1-6. Rehefa miantso Andriamanitra dia tsy manavaka Izy na manao ahoana na manao ahoana toe-pontsika. Rehefa miantso ny Tompo dia manao fanekeena amintsika ary mihazona izany teny fanekena izany hatramin'ny farany ary miantsoka ny hoavintsika manontolo. Midadasika be ny « mission » apetraky ny Tompo amintsika, fa fahafozana sy fankatoavana no andrasany amintsika mba hanantsika fanantenana. Tanteraho amin'ny fifaliana ary ny aiatsoany anao fa mampantanera ny mandrakizay aminao Izy.

Nanamafy ny mpitandrina Ravaloson fa betsaka ny fampianaranana sy ny zava-bitan'ny Mpitandrina Ranjakavola mianakavy, ka rariny raha mahatsiaro azy ny fiangonana satria nahita zavatsoa taminy.

Raha nandray fitenenana kosa ny Mpitandrina Ranjakavola, dia nilaza fa ny fitondram-piangonana sy ny rafitra no nampisotro ronono azy, fa ny fitoriana ny Filazantsara kosa dia mandram-pikimpy ny maso. Nisaotra ny fiangonana izy tamin'ny fahatsiarvana sy fitrotroana am-bavaka ary ny fanolorana hita maso tamin'ny alalan'ny rakitra.

R.Sidonie



Ny Mpitandrina Ranjakavola mivady.

IFR Tafatsangana ny birao maharitry ny maintimolalin'ny sekoly

Notanterahina ny sabotsy 6 Mey 2023 ny fihaonamben'ny sekoly Rainandriamampandry KTR/IFR Ankadifotsy. Tamin'izany no nananganana ny birao maharitry ny maintimolalin'ny sekoly ka ireto ireo voafidy handrafitra ny birao maharitry:

- Filoha: Randrianatoandro Tiana Lova soa,
- Filoha Mpanampy: Rajaonalimanana Joël
- Mpitantsoratra: Andriamialinjara Zo sy Rabearimanana Stella Princy
- Mpitahiry vola: Andriamanantena Lanto
- Mpitantsoraty ny vola: Rafanomezantsoa Iandry Tiana
- Mpanolo-tsaina: Rasandimanana Miatrika, Rajaonarison Mamy Veve, Ratsimandresy Valisoa Tahina Johnson, Ravelojaona Tahiana, Nomenjanahary, Ramiliharisoa Mialy ary Rabarjohn Lala Tiana.

Ny antony nananganana ny fikambanana, hoy ny filoha, dia ho fampivondronana ireo rehetra izay nianatra tao amin'ny sekoly KTR/IFR, ny mpampianatra izay nampianatra, ny mpandrahara, ny Mpikambana nifandimby tao amin'ny komity mpitantana na ny filankevity ny sekoly na ny "FKS". 16 000 hatramin'ny 18 000 isa ny olona nandalo tao raha nanomboka ny taona 1978 hatramin'ny Bachelor 2022.

Mbola ao anatin'ny famolavolana izay mety ho tetikasa fohy ezaka sy lavitreza ny komity ankehitriny.

fifiAV



Maintimolalin'ny sekoly IFR.

Recollection FKB Ny fahamainana ara-panahy

Nafonja ny lohahevitra tamin'ny fampianarana nataon'ny fikambanan'ny Kilasin'ny Bai-boly sy mpitoriteny nandritra ny "recollection" natao ny 1 Mey lasa teo.

Fanaon'ny fikambanan'ny kilasin'ny Bai-boly sy mpitoriteny eto Ankadifotsy efa an-taona maro ny fitokanam-bavaka na ny "recollection". Ny alatsinainy 1 Mey 2023 tontolo andro indray no namerenana izany taorian'ny COVID-19, ka teny amin'ny MAMRE Ambavahadimitafo Masera FJKM no nanaovana izany.

Fitaoman'Andriamanitra antsika amin'ny fiaianam-panompoana

Niompana bebe kokoa tamin'ny fampianarana nataon'ny Raiamandreny Mpitandrina Ravaloson, niainga tamin'ny Jaona 21 : 1 - 14 ny fotoana, izay nilazany fa misy fisehoana telo nataon'i Jesoa :

1. Ny nisehoan'i Jesoa Kristy tamin'ny mpianatra tsy niorina, tsy finoana. Nezahana notakonana izany fitsanganan'i Jesoa Kristy izany,
2. Jesoa Kristy nanaporofo mazava izay nasehony tamin'i Tomasy
3. Fiarahan'i Jesoa Kristy nisakafo tamin'ny mpianan

Notsindriany avy tamin'ny Jaona 21:1-14 koa ny Fitaoman'Andriamanitra antsika ao anaty fiaianam-panompoana, izay mila faharetana. Ny fivernen-dalana ao amin'ny asa fanompoana kosa anefa dia miteraka fahapotehina sy tsy fahombiazana eo amin'ny fiaianana.

Ny hiheveran'Andriamanitra antsika mandrakariva anaty fanompoana

Misaina ny mikasika antsika ary manara-maso antsika hatrany Izy. Ny olam-piaianao izay hitany ary no hitondran'Andriamanitra vahaolana hatrany Salamo 139:1-6 fanambaran'i Davida ny finoana sy fandresen-dahatra.



Ny mpitandrina Ravaloson no nitondra ny fampianarana.

Tsy miafina amin'Andriamanitra ny fiaianao, eo akai-kinao mandrakariva Izy. Ny fanatrehan'Andriamanitra dia manaoana ny fanahiana. Mikasika Anao izy izay mitarika famonjena, fanasitranana.

Ao anaty fanompoana no hiheveran'ny Tompo anao.

Ny fanompoana dia mitaky ny fanahin'ny fahafoizana

Mila mahafoy amin'izay rehetra omen'Andriamanitra hananana toe-panompoana amin'ny fifaliana, ary mitady sitraka amin'i Jesoa amin'ny fanompoana, hoy ihany izy, fasy maty antoka.

Misy 3 ny "Valim-pitia" araka ny fampianarana: ny fiahiana sy. fanambinana, ny fanenjehana, ary ny fiaianana mandrakizay.

Koa atao amim-pahatokiana ny fiaianam-panompoana ary mila miantehatra amin'ny Tompo isika fa ny fangolen'ny devoly no mahangoly, mampangatsika antsika.

Hikatsahan'Andriamanitra fionbonam-piaianana isika

Zava-dehibe ny fiaarahmisakafo amin'ny Tompo, ny mpiara-manompo indrintra ny ankohonana (sakafo agape).

Misy ny homamiadana 4 mamely ny fiaianan-tokantrantsika ankehitriny : ny

"routine" mandeha ho azy, fahamainan'ny fifandraina, "viol" heriseta, ary ny fanolanana.

Nomeny tamin'izany ary ireo Fanalahidin'ny fiaarahmiasa mahomby KLE avy amin'ny (Lioka 5 : 4 - 7)

K - Kristy no atao ivon'ny fiaarahmiasa, sy fiaarahmaina, ao amin'i Kristy no hijerena ny zavatra rehetra ahatsapana ny fanatrehan'Andriamanitra sy ahitana ny lavy miabon'ny fiaianana.

L - Lehilahy lehibe miaina ao amin'ny fiaarahmiasa=mila mitombo(saina, vatana, fanahy) rehefa misy fahamatorana, afaka mifanitsy, mifampiteny, maha-zaka tsikera, vonona handray am-pitiavana ny fano-roana atao aminy ka tonga mivelatra ny fomba fijery na ny "vision"

E - Ezaka hifarimbonana no kendrena ao amin'ny fiaarahmiasa, fifarimbonana no hahazoana fahombiazana. Andininy faha-7, tsy tafakatra ny harato raha tsy nifarimbona. Misy ny fomba fijery, fihetra, fandinika, fitsarana nateraky ny famolavolan'ny fiaarahmonina mila hialana.

Koa raha te-hivoatra eo amin'ny fiaianana manontolo, dia mila miova ny lasi-tsaina sy ny fahazarana "change-ment de paradigme"

Misy ireo olana raiki-tam-pisaka tsy mahatafavoaka. Mila mivoaka ny tontolo maha-zatra banana fijery vaovao.

Isaia 55:12 - 13 ny zavatra rehetra hitondran'Andriamanitra antsika no mitondra fifaliana, entin'Andriamanitra hanehoany ny voninahiny isika.

Ary ny fanahiana rehetra dia esorin'Andriamanitra ha-hazoana fanantenana.

Atrikasa sy fifampizarana

Ny tapany faharoa tam'in'io "recollection" io kosa dia nanaovana fandrevonana isan-tarika ny amin'izay endrika iseoho'ny fahamainana ara-panahy eo amin'ny tena, ny fianakaviana na ny ankohonana, eo amin'ny fiaarahmonina sy ny fiangonana ary eo amin'ny firenena sy ny tanindrazana. Namahavahana koa ny antony mahatonga ireo sy ny vokany, ary izay mety ho vahaolana ary indrindra ni-fampizarana izay fomba mety hampiharana ireo vahaolana naroso mba tsy hijanona fahalalana ara-tsaina fotsiny izany rehetra izany, fa mba hahavakatsoa ho an'ny fiaianan'ny tsirairay.

Harafitra ho tahirin-kevitra ho an'ny kilasin'ny Baiboly sy mpitoriteny izany rehetra izany.

Malala soa /Fifi AV

Fiadanana

Nampanao fifaninanana ireo mpanao sary hosodoko izay misantoka amin'ny atao hoe: "Fiadanana" ny mpanjaka... Marobe tokoa ireo nandray anjara tamin'izany, kanefa roa ihany no voafantina sy heverina fa mahafehy ny hevitry ny teny hoe: "Fiadanana". Tsy maintsy misafidy iray anefa ny mpanjaka mba hotolorana ny amboara nampantanenaina.

-Ny iray dia nanao sarin'ny ony mahafinatra sy milamina tsara. Ilay ony amin'ny sary dia toy ny tena fitaratra ho an'ny tendrombohitra manodidina maintso mavana. Eo amboniny dia lanitra mangamanga omban'ny pentin-dra-hona fotsy mangatsakatsaka... Izay rehetra mandinika izany sary hosodoko izany dia resy lahatra sy mihevitra fa izany tokoa no fiadanana tonga lafatra.

- Ny faharoa dia nanao sarin'ny tendrombohitra ihany koa. Tendrombohitra solasola, feno korotam-bato, tsy misy hazo mihitsy ny tampony (noho ny doro tanety). Eo amboniny dia raho-mainty miaraka amin'ny oram-baratra sy tselatra. Eo anilan'ny tendrombohitra dia misy ranobe mikoriana (chute



d'eau)... Toa tsy milaza fiadanana velively akory ny fahitana izany rehetra izany. Kanefa rehefa nandinika tsara ny mpanjaka dia nahatsikaritra kirihi'tala kely maniry teo ambonin'ny vololampy ambadik'ilay rano. Ao anatin'izany kirihi'tala kely izany dia misy akany ahitana vorona mikotrika amim-pahatokiana ny atodiny na dia eo aza ny tababana ny ranobe..."

Mihevitra ny mpanjaka fa ity faharoa ity no mendrika sy tsara indrindra hotolorana ny loka. Nanazava ny anton'ny safidiny ny mpanjaka: "Ny fiadanana dia tsy ao amin'ny toerana milamina sy tsy misy tabataba akory. Tsia... Ny fiadanana dia eo anivon'ny korontana sy ny olana ary ny faharatsiana rehetra satria ao anatin'ny fo no misy azy!"

Fa hoy i Jesoa: "Fiadanana no avelako ho anareo, ny fiadanako no omeko anareo, tsy tahaka ny fanomezan'izao tontolo izao no fanomeko anareo." (Jao 14: 27)

Rabehatonina James, Mpitandrina

Cours d'appui Mbola mitohy ny fandraisana mpianatra

Mbola mitohy ny fandraisana mpianatra hahazo tohana amin'ny « Cours d'appui » karakarin'ny Farimbona eto amin'ny FJKM Ankadifotsy. Ireo mpianatra hanala fanadinam-panjakana BEPC sy bakalorea no afaka misitraka izany fampianarana izany.

Ho an'ireo izay liana hahazo izany tohana izany, dia 3 000 Ariary no saran'ny fisoratana anarana ary mila sary tapaka 1. Ny zanaky ny fiangonana manana karatra sy ny mpianatry ny IFR no afaka misitraka ity fanothanana ity. Isan'andro amin'ny 6 ora hariva eny amin'ny IFR no mianatra, araka ny fanazavan'andriamatoa Ravalison Miharimbola, surveillant général ny « Cours d'appui ».

Hatreto dia miisa 40 no efaka manarakana fiofanana ao amin'ny kilasy T9, 38 kosa ny TA, raha 15 ny TC ary 18 ny TD. Any amin'ny faran'ny volana Jona vao hifarana ny fampianarana ho an'ny T9 raha toa ka amin'ny tapaky ny volana Jolay kosa vao ho tapitra izany ho an'ny taona famaranana (Terminale), hoy hantany ny fanazavan'ny tomponandraikitra.

Tsara homarihana fa ny 2 May no nananterahana ny fanom-paoam-pivavahana fanokafana ity « cours d'appui » ity.

R.Sidonie

BATISA

« ...dia nisokatra ny lanitra, ary ny Fanahy Masina nidina teo amboniny... » Lio. 3. 22

- Rakotoson Ikoriantsoa Valiha

Fiononana

« Fa Izaho mahalala ny hevitra iheverako anareo, hoy Jehovah, dia hevitra hahatonga fiadanana, fotsy loza, mba hanome anareo fanantenana ny amin'ny farany... » Jer. 29. 11

- Razakarivoninjatovo Aurélien Lalaina
- Ravaonindrina Herisoa Norbertine
- Ramanampampony Jeannette

TSARA HO FANTATRA

Fandaharam-potoana maro no nasiam-panovana nanomboka ny volana Aprily teo. Toy izao manarakana izao izany :

- **Ny alahady fahatelon'ny volana sy alahady voalohany** dia misy ny Fandraisana Fanasan'ny Tompo, koa amin'ny **06 ora sy sasany** amin'ireo fotoana ireo no **fidirana voalohany**.

- Ho an'ireo manana tsy salama na ray amandreny tsy afaka mamonjy fotoam-pivavahana, dia afaka milaza ao amin'ny mpandrahahara handaminana ny **famangian'ny Mpitandrina any an-tokantrano** isaky ny alakamisy.

- **Ny alahady farany amin'ny volana no anantantahana ny Ankatoka** ka manomboka amin'ny 09 ora, Ankatoka : fanomanam-panahy amin'ny Fandraisana Fanasan'ny Tompo ary fandaminana ireo raharahan'ny fiangonana avy any amin'ny mpihevidrahara.

- **Ny Katekomena** dia mianatra isaky ny alahady ary miditra amin'ny **2 ora hariva**

- Ireo taratasy rehetra ampandalovina mpihevidrahara kosa dia ny **alahady faharoa** fara-fahatarany no tokony ho tonga ao amin'ny mpandrahahara

- **Ny fandraisan'ny mpitandrina ny vahoakan' Andriamanitra** dia isaky ny **Talata sy Alakamisy amin'ny 3 ora** ao am-pianganana.

- Ireo hanao **dinika batisa sy mariazy** kosa dia ao amin'ny Mpandrahaharan'ny fiangonana Ato Ravoajanajary no maka ny dinidinika momba izany mialoha ny hihonana amin'ny Mpitandrina.

Tanindrazana malala, firenena miadana

Fiafiana ara-pototra amin'ny firenena

Ny fitodihana amin'ny fepetra sy masontsivana no ahafantaranana ny maha-izy ny biby sy ny zavatra ary ny olona. Mihitatra koa ny banjina feno sivana mankany amin'ny famaritana ny firenena.

Tsy mampitovy hevitra sy fomba fijery ary manakana fiaraha-monina tony ny famaritana izay tsy mitsahamiova. Ny fiovana mikasika ny famaritana ny firenena dia mivoa arakaraka ny foto-kevitra entina mamaritra, tahaka ny re-hefa manao kajy "mathématiques".

Takiana mia-loha ny tontolo entina hijerena sy hamahana ny olana ; "domaine de définition, contexte". Ahitana fiso-kafana kely ny toriteny, manampy fanontaniana vitsivitsy ny Mpitan-drina ao anatin. Ary mandray an-jara ny iray fiangonana, amin'ny famaliana ny fanontaniana. Fomba azo raisina ho fitsapana raha mihaino ny mpiangona na tsia, izany, ary indrindra koa fiarahanana manorina ny hafatra sy ny fampianaranana ao am-po. Tombony no azo amin'io fandraisana anjara avy amin'ny mpiangona io satria mihaino sy manaraka, ary mandray ny hafatra entin'ny toriteny. Ny FJKM Ankadifotsy ho tohana fanampiny, dia mampiasa ny fafana "écrans" hitanisana sy hameranana ny vontoaty sy ny fotokevi-dehiben'ny toriteny. Ny Mpitandrina ihany kosa aloha no hita ho tomponandraiky ny toriteny, raha ny fotoana sy ny anjara teny no jerena ao anatin'ny fifanakalozana maivana, ary tsy hita ny kabary tsy valiana izay mahazatra.

Raha ampiharina amin'ny firenena izay miara-mamaritra ny fisiany sy ny hoaviny, dia fepetra sy masontsivana vitsivitsy no ahafantana mamaritra azy. Ao ny hita mivantana ary ao ny tsy azo tsapain-tanana. Ny hita maso sy azo tsapain-tanana dia ahitana ny mponina, ary ny tany itsahana sy itoerana ary ifampizarana. Voapetraka amin'ny alàlan'ny zavatra tsy hita maso koa ny firenena. Any am-piandohana, dia mifanaiky ny olona maro fa afaka miara-monina, amin'ny alàlan'ny fifanekena sy fiombonana amin'ny fomba sy soatoavina, ary filamatra sy ny soa iombonana. Ireo antontan-kevitra sy antontam-penitra entina miaina ireo no mamaritra ny fanao sy ny ekely tsy atao. Arakaraka ny handrosoana indray kosa anefia, dia hita fa tsy àry mitovy ny hetahetan'ny tsirairay na dia mitovy fomba aza. Mety maka endrika fifanoharana ny tsi-fitoviana, ka mitondra ho amin'ny ady hevitra sy fifandiranana manakorontana ny firenena iaraha-monina. Ny mampiray tsy azo lavina ny Malagasy amin'izao fo-toana izao, dia ny teny izay anisan'ny entina mamaritra ny maha-firenena, kanefa tsy voatery hitovy hevitra momba ny maha-olom-pirenena azy ny malagasy.

Ny Malagasy kristianina koa dia manana anjara zo sy adidy, "fa hahazo hery ianareo amin'ny hilatsahan'ny Fanahy Masina aminareo, ary ho vavolombeloko any Je-rosalema sy eran'ny Jodia sy Samaria ary hatramin'ny faran'ny tany." – Asan'ny Apostoly 1:8

Finoana mifahatra tsy an-kenatra, mitsinjo ny soa sy asa mitondra vokatra

Tsy feno ny valinteny rehefa apetraka ny fanonta-

niana amin'ny fahatsapana maha-olom-pirenena, fa am-pahany no azo. Ny valiny dia toa mamaly ny hoe "iza aho?" ka izay ao anatin'ny karapanondro no hamalian'ny maro azy.

Ny karapanondro dia fitaovana sy harena, satria maritra ny inona, ny iza, ny oviana, sy ny aiza. Ny iza moa dia valian'ny anarana sy ny fanampinanaranana ary ny ray sy ny reny niteraka. Taloha dia napetraka tao ana-tin'ny karatra mihitsy ny lokon'ny maso, ny halavana. Ny daty sy ny toerana na-haterahana koa dia voamarika ao, toy ny toerana onenana.

Ny zava-dehibe manodidina ny karatra kosa dia tsy dia omen-danja firy loatra. Misy fotoana no ampiasaina ny karatra, marina mihitsy fa tsy ilaina ny mampidiera azy amin'ny fotoana rehetra.

Ny fananana kara-pirenena dia tsy azo ianteherana loatra, hilazana fa manana toetra olom-pirenena izay rehetra manana azy. Ny fanehoana zo sy ny fandraisana anjara adidy no hanomezana famaritana ny fisiana sy ny maha-olom-pirenena. Raha te-hanamafy io toetra maha-olom-pirenena io, dia fannontaniana momba ny anjara toerana manoloana ny fiafiana ananana zo, sy indrindra ny fomba enti-miaina manoloana ny andry mandrafitra ny fiafiam-pirenena no tsara ifantohana.

Tsy ambanin-javatra ny fampisehoana karatra, rehefa hangataka taratasy ilaina any amin'ny biraom-pokontany. Ny banky koa dia anisan'ny mitaky ny fampisehoana karatra, mbà hisitrahana zo haka vola sy hampiasa vola amin'ny filana manokana. Olom-pirenena feno na ny tsy ampy taona aza. Voafarity ny fitsipika sy ny lalana ary ny fomba ny maha-olom-pirenena. Ny kopia nahateraha no entina manamafy ny maha-olom-pirenena ho an'ny zaza, ny ankizy sy ny tanora tsy feno valo amby folo (18) taona.

Rehefa manatona ny daty fankalazana ny fetim-pirenenana na ny fotoam-pifidianana, dia misarika ny saina sy resahana ny momba ny andrim-panjakana, izay ahitana ny fiadianana ny Repoblika, ny antenimeram-pirenena, ny antenimieran-doholana, ny fitsarana araka ny sokajiny avy, ohatra ny fitsarana avo momba ny lalampanorenana. Dia vao mitsidika ny voalohan'ny volana Jona dia heno ny antso, mbà hananganan'ny isan-tokantreno ny sainam-pirenena. Mari-pamanterana sady mari-piandrianana ny sainam-pirenena, ny filamatra «Fitianava - Tanindrazana - Fandrosoana», ny hiram-pirenena "Ry Tanindrazanay malala ô !"

Tokony itodihana tsara ny teny mbà hamantaranana ny heviny :

Ny firenena : mijoro ho firenena ny antoko, ny von-drona, ny fianakaviana maro mitambatra, ka fehezin'ny ambopatra na faniriana te-hiara hiaina mbà tsy hahavery ny fisiany, fa hitazona sy hanabe voa azy.

Maka endrika mivelatratra ny firenena rehefa minia na manana finiavana ny mpiara-monina ao anatin'ny firenena, mbà hisy rafitra hitantana sy handrindra ny fiaraha-monina. Mametraka ny fahafahany ho ambanin-javatra

ny tsirairay, raha ny tombon-tsoa iombonana no kendrena. Ny lalana sy ny didy ary ny dina no ifanekena hi-fampitantanana. Rehefa izay no misy dia tafapetraka ny Firenena-Fanjakana. Fepetra mahafeno azy ny fisian'ny tany, ny mponina sy ny fahefana politika, iray mitambatra, ho an'ny tombontsoa iombonana na ho antoky ny fiafaha-monina tsara sy tony kokoa.

Ny endrim-pitantanana no manaraka izany fepetra rehetra izany, ary hanamaritana raha Repoblika na Fanjakan - fomba fitondrana ny firenena amin'ny alàlan'ny fisiana mpanjaka. Hoo an'ny Malagasy, dia maka anjara toerana ao am-po, sy eo anivon'ny fifaneraseran'ny olom-pirenena ny teny hoe "Tanindrazana".

Maka hevitra tanindrazana ny firenena sy ny fanjakanara ara-drafitra politika, rehefa mahatsiaro sy maniry ary manana hetaheta hiaro soatoavina, sy mitandro ny fiziany ara-pomba, ara-piteny, ny mpiara-monina. Hita amin'izany ny fiarovana sy ny fahasarotinana, mahakasika izay ifanekena fa iraisana araka ny napetrakny raia-mandreny ka ifandimbiasana.

Anisan'ny maha-sarotiny ny Malagasy, ohatra, ny tany lovaina tamin'ny fifandimbiasana raiamandreny maro izay antsoina hoe razana. Dia tsy mahagaga tokoa rehefa maka anarana misy tandindona ara-panahy, sy araphetseham-po ny tany rehefa antsoina hoe tanindrazana. Ny fankalazana ny fetim-pirenenana dia anisan'ny mampiray sy mampihetsika, ary manamafy ny fitiavana tanindrazana, ny fanajana ny firenena ary ny fankatoava ny fiandrianam-pirenena.

Raha hiditra fotoam-pifidianana ny Malagasy amin'ity taona 2023 ity, dia manana zo sy adidy amin'ny maha-olom-pirenena. Adidy ny hihevitra, hanaraka ny fano-nanana, hampanjary ny fananterahana hatramin'ny androm-pandatsaham-bato, ka hatrany amin'ny fikirikana sy fivoahan'ny vokatra.

Manana anjara fampanjakana ny fitoniana, ny filimanana manalavitra ny fifandiranana ny olom-pirenena, hisafidy izay heveriny ho olo-mendrika hitantana, sy hanangana firenena mendrika ara-pahamarinana manoa ny rariny, amin'ny fanajana ny fahasamihafana izay hara. Raha hifanditra ara-kevitra, angamba tsy dia haninona loatra, fa ny herisetra na ara-kevitra na mihiatra ara-batana, aman'aina no fady, manimba ny fiafiam-piara-monina mitsinjo vokatsoam-pahafahana ho an'ny tsirairay ary koa iombonana.

Ny isavorovoroan-ki-lantoana, mbà hiadian-ke-vitra hatrany amin'ny fokontany ka hatrany amin'ny fitondrana mpanantantreka, mandalo ny antanantohatry ny fanapaha ny fandaniana ny lalana. Ho fiadan-piara-monina anie no mia-loha ny hevitra hisfampitantanana, ho an'ny olom-pirenena malagasy manana kara-panondrom-pirenena, sy ho an'izay rehetra mitondra zom-pirenena hafa ka monina eto anivon'ilay Madagasikara, tanindrazana miandry ho vontom-pilantsarantsar'I Krisry Jesoa Malala, na dia efa vonton-karena ara-javaboahary sy ara-olona tokoa aza.

"... mahatoky, feno fahendrena, dia ho tany sambatra ilay Madagasikaranay !" - Hira FFPM 734:3
Jocelyn R.



TENY FIAINANA

Ary raha ny rahalahinareo ihany no arahabainareo, inona no ataonareo mihoa-tra noho ny sasany ? Moa na dia ny jentilisa aza tsy mba manao toy izany ihany va ?
Matio 5:47

> VOLINTSAINA

Resabe

Tena tia miresaka ny Malagasy, ary raha mifanatsafa aza dia milaza hoe : tsisy vaovao anefia efa ho atsasak'adiny vao vita ny resaka... Ilaina ny miresaka, kanefia Inona ary no foto-dersaka tena mahavarana ny olona ankehitriny ? politika, so-sialy... Misy sokajy 2 ny mpiresaka : ao ireo Zatra miresaka "hevitra" ho fampandrosona fa kosa ireo zatra miresaka "olona" ka sady tsy mandroso no tsy mampandros.

Ny olona te-handroso araka izany dia miresaka vina, tetik'asa, fampandrosona fa tsy lany ora mifosa sy manao tetiripaka ny fiafiany hafa...aiza ho aiza isika kristiana amin'ity "resabe" ity. Hoy ny Jakoba 3 : 6. Ary afo ny lela, dia faharatsiana tsy hita lany; eo amin'ny momba ny tenantsika dia ny lela no mampintimpentina ny tena rehetra ka mampirehitra izao zavatra ary rehetra izao, sady arehitrity ny helo izy.

FifiAV

> PERIKOPA JONA

Iorenan'ny fahafahana ny Tompo 04 Jona

Mpits 4.14-24, Jao 8.31-38, Asa 16.16-24

11 Jona

Sal 66. 8-12, Jao 8.1-11, Asa 16.25-34

18 Jona

Eks.14: 23- 31, Lio.7: 1- 10, 1Pet.2: 11- 16

25 Jona

Deo.29: 1- 5, Mar.9: 14- 29, Rom14: 13- 23



FAFANA

Mischo isam-bolana

Talen'ny gazety

Ravaloson Mpitandrina

Mpandrindra :

ANDRIANARISON Veronica RAHAINGOMALALA Sidonie

Komity fanoratana :

RAZAFINDRANGALY Ninie RAKOTOARIVELO Tojo hery RAZAKA Ianjaniaina RAMARO Rojo

RASOAVELOSON Jocelyn RANDRIANASOLO Haja

ANDRIANTSILAVO Harinjaka Mampianina

RAHANTRAMALALARISOA Ralantoharimana

Vonifanjainaina Robertine RAVELOARAJAONA Fanja

ANDRIANARIJAONA Olimala Livaharisoa

Malala Andrinainaina RAVELONARIVO Harilalaina

ANDRIANTSOAMIHAMINA RATSIMATAHOMANANA Nini

Fanisiana Tsipelina :

RATSITOARISON Hanta

Rindra ara-takelaka :

RANAIVOSON Haja Mailaka :

fafanagazety@live.fr

Tél. : 034 84 497 64

Printy :

Imprimerie RAJAONARIVONY

Adiresy :

Lot IVN 50 A

Ankadifotsy - 101 Tanà GSM : 033 14 281 27

Fintina toniteny

VOLANA MEY

ANDRIAMANITRA MIASA NY FANAHY MASINA

Alahady 21 Mai izay nalaina tao amin'ny Genesisy 12:1-6

Inona no fomba anehoan'Andriamanitra ny fiantsoana antsika ?

Hafatra roa lehibe no hozaraina amintsika amin'izany:

1. Ny antson'Andriamanitra dia mifamato-tra:

- amin'ny fifidianana:
Fomban'Andriamanitra ny miantso ny mpanompony hanao ny asany.

Tsarovy anefia fa isika rehetra dia nantsoiny hiara-hiasa Aminy.

- amin'ny fanekena:

Rehefa manakya ny antsony isika, dia manao fanekena amintsika koa ny Tompo hiantoka ny hoavintsika.

- amin'ny iraka:

Mametraka iraka ampanaovala antsika ny Tompo ary tokony hahatsiaro ny hasarobidin'izany isika.

2. Hiatrehantsika izany antson'ny Tompo izany:

- Ny fahafozana:

Mila mahafoy isika amin'ny asan'ny Tompo ary miala amin'izay rehetra matatopatotra sy

mangeja antsika, mba hananantsika fijery vaovao.

- Ny fankatoavana:

Mila feno fankatoavana isika mba hahatantrehan'ny asa.

- Ny fananana fanantenana :

Tanteraho amin'ny fanantenana sy fialiana ny asan'Andriamanitra satria hisitrahantsika valim-pitia sy valisoa avy Aminy izany, dia fihahiana sy fahasoavana.

Amen

<

Saha Edena

Nankalaza an'Andriamanitra noho ny faha-15 taonany

Feno 15 taona amin'ity taona 2023 ity no njoroan'ny Saha Edena eto amin'ny FJKM Andriamanitra ka nisy ny fankalazana an'Andriamanitra noho izany fotoan-dehibe izany.

Notanterahina ny alahady 14 Mey 2023 tontolo andro ny fankalazana an'Andriamanitra noho ny faha-15 taonan'ny Saha Edena. Ny maraina dia nomarihana tamin'ny fanompoam-pivavahana izany ka nisy ny tantara fohy nataon-dramatoa Rajaonarisoa Tiana Harivony, filohan'ny Saha Edena nampahafantarana ny fikambanana. Fianakaviana iray no nanolena hikarakara ny fanaingoana ny Alitara Masina talohan'ny nisian'ny Saha Edena.

Voninkazo maneho ny fahatsarana

Ny endrika nanamarihana ny faha-15 taonan'ny Saha Edena dia voninkazo eo an-to-kotanim-piangonana, sezamariazy roa, vazy lehibe roa natolotra ny fiangonana. Ny tolakandro kosa, dia nisy ny famelaberan-kevitra izay nataon'Andriamatoa Rakotonavalona Maholy Mpitandrina, ka ny lohahevitra tamin'izany dia : "Ankohonana mikarakara ny Tempolin' Andriamanitra". Tamin'izany no nilazany fa ny fiangonana dia manana ny foto-pampianarana mampiavaka azy. Nisy ny fivoaran'ny fiangonana miainga tamin'ny fampianaran'i Jesoa Kristy izay nandravany ny fivarotana teo amin'ny kianjan'ny Tempoly. Ny dikan'ny Tempoly dia trano, izany hoe fanorenana na "édifice" ka ny fifandraisana na "communauté" izany no maha protestanta, fianakaviana no anatin'ny fiangonana, ka trano fihaonan'ny fianakaviana izany ny fiangonana.

Ny Saha Edena dia toerana fibeazana ho fikolokoloana ny fianakaviambe iray samy hafa toetra, fomba fijery, fomba fiaina, samy manana ny mahajazy azy, kanefa dia ampiraisina ao amin'ny fiangonana. Ny alitara protestanta amin'ny maha protestanta "réformé" azy dia hita taratra ny fahatsoram-piaianana, afaka mihaona amin'Andriamanitra, misy ny fifandraisana amin'Andriamanitra. Inona no hanorenana izany ankohonana protestanta izany ? Ahoana ny fijerin'ny réformateur ? Raha amin'ny fijery ara-tSoratra Masina dia fanozana avy amin'Andriamanitra,

manitra ary Andriamanitra no manorina, azy, hampionbonina hifanakaiky. Nomen'Andriamanitra ny Ray aman-dreny ny zanaka. Ao amin' ny tokantreno dia tokony hahatsiaro fa fanomezan'Andriamanitra ny vady, ny Ray aman-dreny, ny zanaka. Ny "modernité" dia manova ny zava-dehibe teo amin'ny fainantsika izay miainga eo amin'ny manodidina azy izay mitarika fitiavantena na "individualisme". Ny ankohonana kristianina dia natao hanabeazana olona fa tsy hamonoana ny zaza, toerana hananany fivelarana "épanouissement", manana zo sy tokony hivelatra. Mila fandidrainsana ny Ray aman-dreny sy ny zanaka, mba tsy ho sempotra ny ankizy dia manana ny tontolo ho azy manokana. Ave-lao ny ankizy hivelatra fa tsy tokony hofefena. Rehefa tsy lehibe ao anatin'ny ankohonana ny zaza, dia miandry fahafatesana. Ny fitiavan'ny reny "Amour maternel" dia zava-dehibe eo amin'ny alitara. Rehefa misy mariazy sy fety dia misy ny fihara-miasa amin'ny mpikambana amin'ny fampihaingoana ny fiangonana araka ny teny ao amin'ny Baiboly "Endrey ny hatsaran'ny tabernakelinao, Jehovah, Tompon'ny maro, ô" Salamo 84: 1. Ny Saha Edena koa dia manatanteraka fitai-zana ara-panahy isaky ny sabotsy voalohan'ny volana izay tarihan'ny raiamandreny Mpitandrina Ravaloson. Manatanteraka fisindana indray mandeha isan-taona koa, ary mijery ireny taninketsam-bo-ninkazo ireny.

Ny olona tia voninkazo dia mariky ny fisokafana amin'ny manodidina azy. Sarobidy ny manana fiangonana tsara izay maneby ny fahatsaran'Andriamanitra satria mampisy fidaliana. Ny zavaboahary dia mariky ny fahavelomana. Rehefa mijery ny voninkazo dia tahaka ny olona mandalo. Tsarovsky foana fa fanararaotra ny fahatsarana dieny mbola manana fotoana. Ny Saha Edena dia toerana hifaneraseran'Andriamanitra amin'ny olona, koa ataovy izay hahatamana ao. Araka ny teny fanevan'ny Saha Edena : "Ary nahoana no manahy ny amin'ny fitafiana ianareo ? Diniho tsara ny fanirin'ny voninkazo any antsaha; tsy mba miasa na mampoly ireny" koa mahareta mikolo voninkazo.

Ny tantaran'ny Saha Edena

Andriamatoa Ranjakavola Mpitandrina no nanolo-kevitra hananganana ny fikambanana hanohizana ny asa ka vondron'olona 5 notarihan-dramatoa isany Ranjakavola Jacqueline sy Ravalison Ianja

Mila ny fanohanantsika mpianakavin'ny finoana ny Saha Edena satria mikasa hanitatra ny asam-panomoana miainga eo amin'ny ankohonana ary mipaka any amin'ny fitandremana maro.

Nanangona Malala Soa

Fikarakarana voninkazo "Saha Edena"

Ireo tompon'andraikitra amin'ny fikarakarana voninkazo Volana Jona

- 03 Jona : groupe 20
- 10 Jona : groupe 21
- 17 Jona : groupe 22
- 24 Jona : groupe 23

Nanangona Malala Soa



Mofomamy nanamarihana ny faha-15 taona.

Fampianarana olon-dehibe mamaky teny sy manoratra

15 mianadahy no nahavita ny fiofanana

Ny 19 Aprily hatramin'ny 3 Mey 2023 no nanaraka fiofanana ny 15 mianadahy ho amin'ny fampianarana mamaky teny sy manoratra, mikajy ary fanabeazana olon-dehibe ka tao amin'ny IFR sy Akanin'aina ambony no toerana nanaovana izany.

Ny tanjon'ny fiofanana dia hanana olona afaka hampianatra mamaky soratra ka hanofana olona mpampianatra hahatonga ny olona hahay hamaky ny Soratra masina any amin'izay toerana misy azy. Ary rehefa vita ny fampiofanana dia midina an-tsehatra ny mpiofana izay nandray fiofanana, manao fampiharana.

Ny toetran'ny fampianarana mamaky teny sy manoratra ary mikajy na FTMM dia arak'asa "alphabétisation fonctionnelle" mifototra amin'ny fainan'ny imponina andavanandro. Ny fampianarana mamaky teny sy manoratra ary mikajy arak'asa dia manaja ireto fepetra ireto, mamaly ny hetahetan'ny filam-piofanana ary filam-pandrosoan'ny mpianatra olon-dehibe sy ny asa. Kendrena tsy hitarazoka (approchement intensif) ny fanatantehana ny asa ary ferana 320 ora ny faharetany farafahakeliny ny fotoam-pampianarana iray manontolo, izay azo tsinjaraina anatin'ny 4 hatramin'ny 7 volana. Misy dingana telo lehibe no tokony hajaina :

- dingana fanomanana (phase pré-alphabétisation)
- dingana fampianarana mamaky teny sy manoratra ary mikajy (phase alphabétisation)
- dingana fanamafisana ny fitaizam-pahalalana (phase de post alphabétisation).

Naharitra 10 andro ny fiofanana, ka nisy ny fanolorana maripankasitrhana azy ireo ny 3 Mey 2023 izay notarihan'ny mpitandrina Ravaloson sy ny mpitandrina Rakotomanantsoa Harinjaka Ravo Naly ary Rasoaosihanana Hélène avy ao amin'ny foibe FJKM sady mpampiofana, notronin'ny filohan'ny AFF avy eto an-toerana Randriatsara Hajason sy ny mpikambana avy ao anatin'ny foibe fitondran-tsekoly FJKM Randrianarisoa Mamy.

I Tes 5:16-17 no nisintonana ny hafatra ho azy 15 mianadahy, "ny fainana kristianina dia tokony fainam-pifaliana mila manana fijaliana isika mba ho vavolombelona ao Aminy koa rehefa mandray fahasoavana, dia mila hita taratra ny fainam-pifaliana". Tsy izay ihany fa ny fainana dia vavaka, rehefa feno vavaka ny fainana dia lasa misy fiovana, ary ny fainana dia mahay misaotra sy manksitraka an'Andriamanitra, ny fitodihana amin'ny Tompo dia fahaizana misaotra Azy amin'ny zavatra rehetra. Aoka ho fainam-pisaorana ny fainantsika iray manontolo.

Koa raha misy andiany vaovao te-hanaraka ny fampiofanana indray, izay ny fiangonana na sampana na sampan'asa eo anivon'ny fiangonana no mikaraka izany, dia mifandray amin'ny foibe fitondran-tsekoly FJKM satria eo ambanay fiahian'ny departemantan'ny sekoly izao "alphabétisation" izao, na hiantso ny mpampiofana ahzoana manatanteraka ny fampiofanana rehefa mahazo fankatoavana avy amin'ny fitondran-tsekoly FJKM.

Nanangona Ianja R.



Fanolorana maripankasitrhana azy 15 mianadahy tamin'ny fiofanana fampianarana olon-dehibe.

STK Hay Kanto Fisindana teny amin'ny Sisaony Parc

Toy ny fanao isan-taona sy araky ny tetiandrony, dia nanao Fisindana teny amin'ny Sisaony Parc ny Hay Kanto ny 18 Mey teo. Fisindana izay nentina hampiray sy hiombonam-piainana ary mba hisian'ny fifankahalalana misimisy kokoa eo amin'ireo mpikambana. Anisan'ireo fisindana nahitana ankizy maro teto amin'ny Sampana Hay Kanto izy.

Hira fiderana natao tamin'ny endrinhy hafakely sy fanompoam-pivavahana narahin'ny hafatry ny filohan'ny Sampana, Ravalohanta Narindra no nanombohana ny fotoana. Niroso tamin'ny lalao fana-zarantena sy fanalana henatra "activités brise-glace" ho an'ireo mpikamban, indrindra ireo ankizy vaovao taorian'izay.

Rehefa hita fa vonona sy nafana ireo ankizy, dia niroso avy hahatry tamin'ireo lalao isan-tsokajiny nomanin'ireo birao; ka ny lalao fampiwasana vatana toy ny : "lancez-vous", "sauté-mouton", "use your heads" ... no natao nialoha ny fihara-misakafo atoandro. Ny tapak'andro hariva kosa, dia ny lalao mampiasa saina sy fahalalana bebe kokoa ny Soratra Masina no natao.

Fiarahana nifaly tamin'ny dihy mirindra sy hirahira ary fano- lorana mari-pahatsiarovana ny tsirairay kosa no namaranana ny fisindana.

Rado Rakotomalala



Teny Sisaony parc ny STK